



## Reglur Kópavogsbæjar um dvöl barna hjá dagforeldrum.

Reglur þessar kveða í fyrsta lagi á um greiðslur, í öðru lagi um ábyrgð, skyldur og rétt foreldra barna í dvöl hjá dagforeldrum og í þriðja lagi um ábyrgð, skyldur og rétt dagforeldra gagnvart börnum og samskipti við foreldra barnanna. Þær byggja m.a. á reglugerð um daggæslu barna í heimahúsum nr. 907/2005 og reglugerð um hollustuhætti nr. 941/2002.

### Greiðslur

#### *Framlag Kópavogsbæjar*

##### 1.gr.

Kópavogsbær greiðir mánaðarlega, í allt að ellefu mánuði á ári, framlag vegna dvalar barna með lögheimili í Kópavogi hjá dagforeldri. Greiðslur geta hafist í þeim mánuði þegar barn er níu mánaða en sex mánaða hjá einstæðu foreldri. Framlög eru í samræmi við gildandi gjaldskrá hverju sinni.

Við 15 mánaða aldur barna hækkar framlag Kópavogsbæjar með börnum hjá dagforeldrum. Hækkun framlags er ætlað að koma til móts við mismun á kostnaði foreldra við annars vegar dvalargjöld hjá dagforeldrum og leikskólagjöldum hins vegar.

Ekki eru greidd framlög til dagforeldra vegna leikskólabarna sem kunna að dvelja í daggæslu yfir sumartímann.

Skilyrði fyrir greiðslu er að dagforeldri hafi starfsleyfi samkvæmt reglugerð nr. 907/2005 og að barnið sé slysatryggt. Framlag bæjarins er ákveðið að teknu tilliti til þess að dagforeldri innheimti dvalargjald af foreldrum barns. Framlagi skal ráðstafa í þágu þess barns sem það er veitt.

Dagforeldri og Kópavogsbær gera með sér þjónustusamning vegna greiðslu framlagsins.

Gera skal þríhliða dvalarsamning staðfestan af foreldri, dagforeldri og daggæslufulltrúa Kópavogsbæjar, við upphaf dvalar hvers barns. Dvalarsamningi skal skilað til daggæslufulltrúa eigi síðar en 15. dag næsta mánaðar á undan útborgunardegi.

## *Útreikningur framlags*

### *2.gr.*

Mánaðarlegt framlag er í samræmi við gildandi gjaldskrá hverju sinni. Framlag Kópavogsbæjar greiðist fyrirfram einn mánuð í senn og skal greiða fyrsta virka dag mánaðarins. Við útreikninga framlagsins er miðað við fjölda virkra daga í hverjum mánuði fyrir sig. Ef dvöl hefst eða lýkur á öðrum tímum mánaðar en um mánaðarmót miðast upphæð framlags við fjölda dvalardaga sem hlutfall af virkum dögum í viðkomandi mánuði.

Framlag er ekki greitt í sumarleyfi dagforeldris né á þeim dögum þar sem um er að ræða lokanir og veikindi umfram það sem reglur þessar heimila. Við útreikninga á frádrætti frá framlagi vegna framangreindra daga reiknast fjöldi þeirra daga sem hlutfall af fjölda virkra daga í mánuðinum. Framlag Kópavogsbæjar greiðist að hámarki tvo mánuði aftur í tímann.

Ef barn fær úthlutað leikskólaplássi í Kópavogi eftir 1. maí og gefst kostur á að hefja leikskóladvöl í maí eða júní, þá greiðir Kópavogsbær framlag út júnímánuð ef ekki vistast annað barn í staðinn. Ef barn fær úthlutað leikskólaplássi eftir 1. júní greiðir Kópavogsbær framlög vegna þess allt til loka ágúst mánaðar að undanskildu 4 vikna sumarleyfi, að því gefnu að ekki vistist annað barn í staðinn. Það er skilyrði fyrir framlagi að barnið hafi verið í dvöl ***há dagforeldri frá 1. janúar sama ár. Þetta ákvæði á eingöngu við um dagforeldra sem eru starfandi í Kópavogi.***

## *Afslættir*

### *3.gr.*

Afslættir er í samræmi við gildandi gjaldskrá hverju sinni.

## *Lækkun framlags*

### *4.gr.*

Ef dagforeldri fær ofgreitt framlag af einhverjum ástæðum áskilur Kópavogsbær sér rétt til að lækka framlag til dagforeldris sem því nemur við næstu greiðslu eða krefjast endurgreiðslu.

Kópavogsbær áskilur sér rétt til að krefjast endurgreiðslu á framlagi bæjarins samkvæmt þessum reglum t.d. ef dagforeldri verður uppvíst að rangfærslum við tilkynningar til foreldra og/eða daggæslufulltrúa um lokanir og veikindi umfram það sem reglur þessar heimila, ef dagforeldri missir leyfi Kópavogsbæjar til daggæslu í heimahúsi eða um brot er að ræða á reglum þessum.

## *Námskeið og styrkir til dagforeldra*

### *5.gr.*

Kópavogsbær greiðir 71 stunda starfsréttindanámskeið fyrir dagforeldra vegna leyfisveitinga.

Stofnstyrkur að upphæð 300.000.- er greiddur þegar starfsleyfi hefur verið gefið út. Tilgangur styrksins er að gera dagforeldrum kleift að undirbúa húsnæði sitt fyrir daggæsluna og kaupa nauðsynlegan búnað til þess, s.s. barnahúsgögn, hlið, fjölburakerru o.fl.

Aðstöðustyrkur að upphæð 150.000.- er greiddur í ágúst ár hvert til dagforeldra sem hafa starfað innan Kópavogs í a.m.k. í eitt ár. Tilgangur styrksins er að gera starfandi dagforeldrum kleift að endurnýja búnað v/daggæslu, til viðhalds og viðurkenndrar fræðslu o.þ.h.

Ef dagforeldri starfar 1 ár eða skemur er krafist endurgreiðslu á helming styrks. Gerð verður krafa um skil á nótum fyrir að lágmarki 2/3 hluta styrks.

5. gr. á eingöngu við um dagforeldra sem eru starfandi í Kópavogi.

## *Dvalargjöld*

### *6.gr.*

Dvalargjald er það gjald sem greitt er mánaðarlega af foreldrum fyrir daggæslu. Í dvalargjaldi er innifalinn allur kostnaður vegna dvalar barns nema annað sé tekið fram í dvalarsamningi. Dvalargjald er ekki samræmt milli dagforeldra.

Dvalargjald miðast við einn almanaksmánuð. Byrji barn í miðjum mánuði er innheimt fyrir þá virku daga sem barnið er í gæslu.

Ef greiðsla vegna dvalargjalds foreldra hefur ekki borist dagforeldri fyrir annan virka dag hvers mánaðar er dagforeldri ekki skylt að taka barnið í gæslu nema um annað sé samið.

Dagforeldri skal gefa kvittun fyrir því gjaldi sem foreldrar greiða. Millifærsla í heimabanka getur gilt sem kvittun.

Dagforeldri er óheimilt að innheimta dvalargjald fyrir fleiri en fimm börn á hverjum tíma.

## *Uppsagnarfrestur*

### *7.gr.*

Fyrsti mánuður barns hjá dagforeldri er reynslumánuður foreldra og dagforeldris. Fullt dvalargjald greiðist á reynslumánuði. Fresti foreldri upphafi dvalar greiðist fullt dvalargjald, frá þeim degi er samið var um að dvöl hæfist samkvæmt dvalarsamningi.

Gagnkvæmur uppsagnarfrestur á dvalarsamningi áður en dvöl hefst er tvær vikur.

Gagnkvæmur uppsagnarfrestur er tvær vikur í fyrsta dvalarmánuði frá þeim degi sem uppsögn er lögð fram og einn mánuður að loknum reynslutíma. Framlag Kópavogsbæjar tekur mið af sömu reglu. Foreldrum og dagforeldri er heimilt að semja um styttri uppsagnarfrest t.a.m. þegar annað barn kemur inn í staðinn fyrir það sem hættir áður en uppsagnarfrestur er liðinn eða dagforeldri hættir störfum.

Uppsögn skal vera skrifleg á þar til gerðu breytingarblaði og lögð fram hjá dagforeldri á virkum degi. Samningi skal sagt upp í síðasta lagi 1. eða 15. dag hvers mánaðar og hefst uppsagnarfrestur 1. eða 15. dag hvers mánaðar.

Sé um fyrirvaralausar uppsögn að ræða af hálfu dagforeldris skal forráðamaður fá endurgreitt dvalargjald fyrir þann tíma sem ónýttur er. Einnig skal endurgreiða framlag Kópavogsbæjar.

Uppsagnarfrestur er gagnkvæmur og báðum aðilum ber að virða hann. Kjósi foreldri að hefja leikskóladvöl áður en uppsagnarfresti lýkur skal það greiða hvorutveggja, dvalargjald hjá dagforeldri út uppsagnarfrest auk leikskólagjalds. Í því samhengi er foreldrum bent á að kynna sér frest til þess að hefja leikskóladvöl samkvæmt innritunarreglum leikskóla og í samráði við leikskólastjóra.

### *Breyting á dvalartíma barns*

#### *8.gr.*

Dagforeldri skal sjá um að Kópavogsbær fái jafnóðum upplýsingar um öll börn sem hefja dvöl eða ljúka dvöl hjá því. Skal dagforeldri skila daggæslufulltrúa mánaðarlegu yfirliti yfir þau börn sem eru í gæslu í mánuðinum, ásamt staðfestingu dagforeldra. Ef breyting verður á dvalartíma barns ber dagforeldri og foreldrum að fylla út þar til gert eyðublað. Gagnkvæmur frestur vegna breytinga er einn mánuður. Tilkynna skal breytingar í síðasta lagi 1. eða 15. dag hvers mánaðar og hefst frestur vegna breytinga 1. eða 15. dag hvers mánaðar.

### *Orlof*

#### *9.gr.*

Orlof er innifalið í dvalargjaldi og því greiðist ekkert gjald á meðan á sumarleyfi dagforeldris stendur. Dagforeldri skal tilkynna forráðamanni og daggæslufulltrúa hvenær það tekur orlof fyrir 1. apríl ár hvert

Lengd orlofs skal vera að lágmarki fjórar vikur. Orlofstímabil er frá 1. maí - 31. ágúst. Starfsár telst vera frá 1. ágúst til 31. júlí. Lokað er hjá dagforeldrum á aðfangadag og gamlársgangur.

## Ábyrgð, skyldur og réttur foreldra.

### 10.gr.

Ákvörðun um dvöl barns hjá dagforeldri er ætíð á ábyrgð foreldra. Foreldrar skulu í upphafi kynna sér aðstæður hjá dagforeldri og hvernig daggæslunni verði háttað. Þeir skulu upplýsa dagforeldri um daglegar venjur barnsins. Foreldrar skulu upplýsa dagforeldri verði breytingar á högum barns sem geta haft áhrif á líðan þess að mati foreldra.

Foreldrar eiga rétt á upplýsingum um skipulag dagsins svo sem svefntíma barna, mataræði, útiveru, leikföng og svefnaðstöðu.

Aðlögun að dvöl barns skal miðast við þarfir þess og skal foreldri dvelja hjá barni sínu í upphafi eftir nánari samkomulagi við dagforeldri.

### 11.gr.

Foreldrum er skylt að virða dvalatíma barnsins. Dagforeldri hefur heimild til að innheimta sérstaklega ef barn er sótt of seint. Ítrekuð brot á þessari reglu jafngildir uppsögn að hálfu foreldris.

### 12.gr.

Foreldrar skulu láta dagforeldri vita sem fyrst og eigi síðar en kl. 9:00 ef barnið kemur ekki í dvöl þann daginn. Foreldrum ber skylda til að láta dagforeldra vita af einhver annar kemur að sækja barnið.

### 13.gr.

Í samskiptum sínum við dagforeldra skulu foreldrar virða það að um heimahús er að ræða.

Telji foreldri barns að dagforeldri hafi lokað umfram það sem reglur þessar heimila skal tilkynna daggæslufulltrúa um það. Telji foreldri barns eða annar aðili að barn njóti ekki þess aðbúnaðar og atlætis hjá dagforeldri sem því ber, skal hann tilkynna það þegar í stað til daggæslufulltrúa, sem kannar málið.

Árlega er haldinn kynningarfundur fyrir nýja foreldra til upplýsingamiðlunar varðandi þjónustu dagforeldra og hlutverk Kópavogsbæjar gagnvart daggæslumálum, m.a. stuðningi og eftirliti með dagforeldrum.

## **Ábyrgð, skyldur og réttur dagforeldra.**

### **14.gr.**

Dagforeldri ber ábyrgð á barni meðan á dvöl hjá því stendur og skal hlúa að andlegri og líkamlegri velferð þess í sem víðtækustum skilningi, sbr. 28. gr. reglugerðar nr. 907/2005. Dagforeldri skal tilkynna daggæslufulltrúa ef barn slasast í daggæslu og jafnframt skrá slys á þar til gert skráningarblað.

Dagforeldri skal veita foreldrum og daggæslufulltrúa upplýsingar um skipulag dagsins svo sem svefntíma barna, mataræði, útiveru, leikföng og svefnaðstöðu sem og upplýsingar um þrif.

### **15.gr.**

Dagforeldri ber að fara að ákvæðum laga, reglugerða og starsleyfissskilyrða sem um starfsemina gilda. Dagforeldri er skylt að stuðla að öryggi barna í hvívetna, svo sem með því að hafa sjúkrakassa á heimilinu og barnalæsingu á skápum með hættulegum efnum. Einnig ber dagforeldri að hafa slökkvitæki, reykskynjarar, eldvarnarteppi og öryggishlið séu þar sem það á við og að rétt bil sé milli rimla í handriðum.

Nota skal örugg og viðurkennd beisli í vögnum og háum barnastólum. Börn í daggæslu skulu aldrei vera skilin eftir eftirlitslaus.

Dagforeldri er skylt að sækja námskeið í slysavörnum barna og eldvarnarnámskeið á tveggja ára fresti og hefur heimild til að taka hálfan starfsdag annað hvert ár í þeim tilgangi.

### **16.gr.**

Dagforeldri ber að passa vel upp á eigur barns s.s. fatnað, leikföng, vagna og annað sem tilheyrir barninu, en það ber ekki kostnað af því ef eitthvað skemmist eða týnist.

### **17.gr.**

Dagforeldri ber að bíða til kl. 9:00, sbr. 10 gr., á morgnana eftir komu barns, en eftir þann tíma áskilur það sér rétt til að fara í gönguferð eða aðra útivist án þess að láta foreldra vita eða bíða lengur.

## 18.gr.

Dagforeldri getur ekki tekið á móti veiku barni. Ef grunur leikur á að barn sé að veikjast eða beri smit á barnið ekki að mæta í daggæslu. Ef barnið veikist eða slasast í daggæslu ber dagforeldri að láta foreldra vita eins fljótt og kostur er og foreldrar sæki barnið. Nauðsynlegt er að barnið nái að jafna sig vel heima af veikindum og mæti aftur þegar það er fært um að taka þátt í allri daglegri starfsemi úti sem inni. Börnum eru ekki gefin lyf hjá dagforeldrum nema brýna nauðsyn beri til.

## 19.gr.

Daglegt fæði barnanna skal vera í samræmi við ráðleggingar Landlæknisembætti/Lýðheilsustöðvar um næringu barna. Dagforeldri skal hafa matseðli dagsins skriflegan og sýnilegan svo að foreldrar geti fylgst með mataræði barna sinna.

## 20.gr.

Verði dagforeldri þess áskynja að barn búi við óviðunandi uppeldisaðstæður, verði fyrir ofbeldi eða annarri vanvirðandi háttsemi eða aðbúnaði þess sé áfátt er því skylt að gera barnaverndarnefnd viðvart. Mælst er til að dagforeldri hafi samráð við daggæslufulltrúa um slík mál. Að öðru leyti fer um slíkar tilkynningar skv. 22. gr. barnaverndarlaga nr. 80/2002..

Áður en dvöl hefst skal tilkynna foreldrum ef gæludýr eru á heimilinu. Dagforeldri og foreldri geri með sér samkomulag um umgengni, ef dýr eru á heimilinu. Ekki er æskilegt að gæludýr séu innan um börnin.

Dagforeldri skal tryggja að gæludýr hafi ekki slæm áhrif á aðbúnað barna á heimilinu og að fyllsta öryggis og hreinlætis sé gætt. Ávallt skal fylgja reglum um dýrahald í Kópavogi.

## 21.gr.

Dagforeldri kaupir slysatryggingu vegna barna í samræmi við reglur Kópavogsbæjar og Félag dagforeldra.

## 22.gr.

Dagforeldri skal skila til daggæslufulltrúa fyrir 15. hvers mánaðar, yfirlit á þar til gerðu eyðublaði yfir þau börn sem eru í gæslu í mánuðinum, ásamt staðfestingu forráðamanna þeirra. Öll börn skulu skráð á mánaðaryfirlitið, óháð því úr hvaða sveitarfélagi þau koma eða hvort um framlag er að ræða eða ekki. Á sama eyðublaði skal dagforeldri skrá alla tekna veikinda – og frídaga sína í mánuðinum á undan.

## 23.gr.

Dagforeldri á rétt á veikindaleyfi í allt að 10 daga á starfsárinu án þess að komi til lækkunar á framlagi Kópavogsbæjar eða frádrætti á dvalargjaldi

foreldra. Veikindadagar umfram þessa daga dragast frá framlagi Kópavogsbæjar og dvalargjaldi.

#### 24.gr.

Dagforeldri skal taka einn starfsdag til símenntunar á ári án þess að draga það frá dvalargjaldi. Fræðsla á árlegum starfsdegi er dagforeldrum að kostnaðarlausu og skipulögð í samráði við félag dagforeldra og leikskóladeild Kópavogs. Dagsetning starfsdags skal liggja fyrir eigi síðar en 1. október ár hvert. Dagforeldri skal gera forráðmönnum grein fyrir dagsetningu starfsdags með a.m.k. mánaðar fyrirvara. Dagforeldrum ber skylda til að mæta á starfsdaginn. Forfallist dagforeldri ber að upplýsa daggæslufulltrúa fyrirfram með viðhlítandi skýringum.

Dagforeldrar hafa heimild til að taka sér allt að fimm daga leyfi á ári sem nýttir eru annaðhvort milli jóla og nýárs eða um páska eða í annan tíma í samráði við foreldra.

Framlag Kópavogsbæjar skerðist ekki vegna þessara frídaga og dvalargjald foreldra helst óbreytt.

Aðrar tilfallandi skammtíma fjarvistir dagforeldra s.s. vegna jarðarfara eða sérstakra fjölskyldu aðstæðna skal samið um sérsaklega við foreldra.

Loki dagforeldri umfram framangreint af öðrum ástæðum lækkar framlag Kópavogsbæjar hlutfallslega og dagforeldri ber að draga dvalargjald foreldra frá. Dagforeldri ber að tilkynna foreldrum og daggæslufulltrúa um lokun umfram framangreindra daga eigi síðar en 15. dags þess mánaðar áður en leyfi hefst þannig að til lækkunar niðurgreiðslu komi í þeim mánuði er umframlokun á sér stað.

#### 25.gr.

Dagforeldri hefur ekki heimild til að fela öðrum daggæslu barna sem það hefur leyfi fyrir nema með samþykki foreldra, sem þá bera ábyrgð á barninu, sbr. 32. gr. reglugerðar nr. 907/2005 um daggæslu barna í heimahúsum.

#### 26. gr.

Fullur trúnaður skal ríkja á milli dagforeldra og forráðamanna um hagi hvors annars. Áriðandi er að upplýsingarstreymi sé gott og óþvingað á milli forráðamanna og dagforeldris. Það er mikilvægur grunnur fyrir góða samvinnu.

Dagforeldri skal kynna foreldrum reglur þessar áður en gæsla hefst.



## **Reglur um leyfisveitingar, eftirlit og leyfissviptingar**

### **Leyfisveitingar.**

#### **27.gr**

Leikskólanefnd veitir daggæsluleyfi að uppfylltum ákveðnum skilyrðum sbr. reglugerð um daggæslu barna í heimahúsum nr. 907/2005.

Ekki er greitt framlag með börnum dagforeldra, nema að viðkomandi hafi einnig önnur börn í dvöl.

Eftir eins árs samfelldan starfstíma er leikskólanefnd heimilt að veita leyfi fyrir einu barni til viðbótar, enda hafi dagforeldri sýnt fram á hæfni til starfsins og veitt börnunum góðan aðbúnað.

### **Eftirlit með starfsemi dagforeldris**

#### *Athugasemdir við störf dagforeldris og áskorun um úrbætur*

#### **28.gr.**

Daggæslufulltrúi hefur með höndum ráðgjöf og umsjón með daggæslu í heimahúsum. Eftirlitsaðili hefur eftirlit með starfsemi dagforeldris.

Daggæslufulltrúi og eftirlitsaðili skrá athugasemdir um það sem áfátt er í störfum dagforeldris, hvort sem það kemur fram í boðuðum eða óboðuðum heimsóknum þeirra til dagforeldris, athugasemdum frá foreldrum eða með öðrum hætti. Dagforeldri skal tilkynnt skriflega um það sem áfátt er og veittur ákveðinn frestur til úrbóta/andsvara, enda sé ekki talið að sá frestur stofni velferð barns í hættu.

Foreldrum skal tilkynnt þegar í stað ef aðbúnaði barns hjá dagforeldri er ábótavant, skilyrði til leyfisveitingar eru ekki lengur fyrir hendi, önnur atriði benda til þess að ekki fari nægilega vel um barn hjá dagforeldri eða barn er í hættu statt hjá dagforeldri, svo sem vegna lélegs aðbúnaðar eða of mikils fjölda barna.

Daggæslufulltrúi og eftirlitsaðili hafa eftirlit með því hvort dagforeldri bæti úr því sem áfátt er og skulu slíkar upplýsingar skráðar.

## ***Máli vísað til leikskólanefndar***

29.gr.

Daggæslufulltrúi skal vísa máli til leikskólanefndar verði hann þess var að:

- a) Aðbúnaði barns hjá dagforeldri er ábótavant
- b) Skilyrði til leyfisveitingar eru ekki lengur fyrir hendi
- c) Önnur atriði sem benda til þess að ekki fari nægilega vel um barn hjá dagforeldri
- d) Barn er í hættu statt hjá dagforeldri, svo sem vegna lélegs aðbúnaðar eða of mikils fjölda barna.

Eftirfarandi atriði kunna að leiða til þess að máli verði vísað til leikskólanefndar:

- a) Sæki dagforeldri ekki námskeið í slysavörnum barna og eldvarnarnámskeið á tveggja ára fresti án viðhlítandi ástæðna, sbr. 15. gr.
- b) Sæki dagforeldri ekki starfsdag til símenntunar einu sinni á ári án þess að boða viðhlítandi forföll, sbr. 24. gr.
- c) Bæti dagforeldri ekki úr því sem áfátt er eftir ábendingu daggæslufulltrúa eða eftirlitsaðila, sbr. 28. gr.
- d) Ítrekaðar athugasemdir við störf dagforeldris.
- e) Önnur atriði sem leiða til þess að skilyrðum 1. mgr. 28. gr. er ekki fullnægt, svo sem brot dagforeldris á reglum þessum eða reglugerð nr. 907/2005.

## ***Leiðbeiningar leikskólanefndar***

30. gr.

Leikskólanefnd skal bregðast strax við og vinna að því með leiðbeiningum og á annan hátt að dagforeldri bæti úr því sem áfátt er, sé aðbúnaði barns hjá dagforeldri ábótavant, skilyrði til leyfisveitingar ekki lengur fyrir hendi eða önnur atriði benda til þess að ekki fari nægilega vel um barn hjá dagforeldri, án þess að barn teljist í hættu statt.

## ***Leyfissvipting leikskólanefndar***

31. gr.

Leikskólanefnd tekur afstöðu til tímabundinna leyfissviptinga dagforeldris á meðan málið er kannað nánar, sé það talið brýnt vegna velferðar barna, sbr. 39. gr. reglugerðar nr. 907/2005, að þau séu tekin tafarlaust úr gæslu.

Leikskólanefnd tekur afstöðu til þess hvort svipta skuli dagforeldri leyfi fari það ekki að leiðbeiningum eftirlitsaðila, þ.e. Kópavogsbæjar.

Leikskólanefnd tekur afstöðu til leyfissviptinga dagforeldris sé grunur um að barn geti verið í hættu statt hjá dagforeldri, svo sem vegna lélegs aðbúnaðar, umönnunar eða of mikils fjölda barna.

## *Málsmeðferð vegna mögulegrar leyfissviptingar*

### 32. gr.

Leyfissvipting byggist á XI. kafla reglugerðar nr. 907/2005 um daggæslu barna í heimahúsum, sem og ákvæðum reglna þessara.

Komi til greina að svipta dagforeldri leyfi tímabundið eða varanlega skal, svo fljótt sem því verður við komið, vekja athygli viðkomandi á því að mál hans sé til meðferðar, nema ljóst sé að hann hafi fengið vitneskju um það fyrir fram.

Áður en ákvörðun er tekin um tímabundna eða varanlega leyfissviptingu skal leikskólanefnd sjá til þess að mál sé nægjanlega upplýst og dagforeldri skal veittur andmælaréttur.

Ákvörðun um leyfissviptingu skal birt dagforeldri með ábyrgðarbréfi þar sem leiðbeint er um heimild til að óska eftir rökstuðningi, kærueimild og kærufrest.

### **Ýmis ákvæði.**

#### 33.gr.

Dagforeldri er óheimilt að setja sér eigin reglur sem eru í andstöðu við reglur þessar.

#### 34.gr.

Komi upp ágreiningur á milli forráðamanns barns og dagforeldris getur hvor aðili um sig leitað til daggæslufulltrúa og/eða stjórnar félags dagforeldra. Fullur trúnaður skal ríkja á milli aðila.

#### 36.gr.

Leikskólanefnd fer með úrskurðarvald um ágreining sem upp kann að koma vegna ákvæða þessara reglna.

#### 37.gr.

Kópavogsbær áskilur sér rétt til að kanna hvort farið er að reglum þessum, t.d. með skoðun dvalarsamninga, heimsóknum til dagforeldra og með annarri upplýsingagjöf frá dagforeldrum og foreldrum.

Reglur þessar voru fyrst gerðar í september 2012, yfirfarnar og samþykktar á fundi leikskólanefndar Kópavogs í mars 2014 og í desember 2015.

Samþykkt í leikskólanefnd Kópavogs 10. des 2015 og bæjarráði 17. des 2015.

Uppfært í samræmi við samþykktir bæjarráðs um aðgerðir í málefnum dagforeldra í maí 2018.